

海澄縣志卷之十二

人物志

明列傳

周起元

周起元字仲先號綿貞萬歷庚子領解明年成進士初令浮梁有大姓欲吞范文正雙溪書院起元持法不阿士論壯之調繁南昌凡盜發他境匿宇下者悉捕得之壬子授湖廣道御史奉勅巡漕振滯疏壅公私便焉時臺臣有上疏攻東林者起元抗疏言東林之學起於楊時今議者欲借道學以攻楊時借楊時

海澄縣志

卷十二 人物

一

以攻羅汝芳顧憲成皆非是劾去朝貴數人而方從哲以中旨起少宰不由廷推又疏駁之左遷出叅粵西值柳慶大饑盜賊蠡起官僚畏縮莫肯行起元親按其地立遞運法多方處置民以無殍而盜悉平擢四川觀察未任備兵通州紀律大肅客兵過懾不敢譁晉太僕卿時鄒元標立首善書院兵科朱童蒙詆爲僞學起元抗疏辨之明年起僉都出撫三吳初爲御史時稅璫高竊在閩橫征海舶洋貨脅官吏燒殺市民莫敢言起元特疏叅之中璫久已側目至是吳中織監李實以郡丞楊姜不行屬禮誣以罪起元三

疏救之實假上供爲名逆取舊額外多至十餘萬又密偵殷戶報爲匠籍吳中大擾起元屢疏叅劾前後所上轉加切至而內監魏忠賢以天下官吏方承順意旨稱功德趨附恐後起元獨每與其黨類齟齬阻其威思有以殺公者會朱童蒙由科臣外轉爲兵備多內援驕橫斃漕卒非法吳民鬩聚生變起元勃然曰天子命我撫民察吏可坐視此等虐吾民耶疏上中旨擢蒙太常削起元職歸里周順昌贈以序曰公去而名益高矣吳人無老少皆隨送涕哭聲塞市童蒙入都出都門迎者多無鬚男子衣服甚麗半纏蟒

駿騎是時蒙已竄身璫局矣故矯排擠正人之旨致起元罪旣歸羣兇志猶未厭喉科臣李魯生劾起元借講學爲名與高攀龍周順昌等朋比刺譏濁亂朝政取李實空印本至京令李永貞具草誣起元阻抑上供冒破鼓鑄逆璫遂矯旨與高周七人同逮緹使至漳漳士民大驚呼設木櫃於郡四門投錢不數日錢滿復擁諸緹使相率泣言周中丞冤且貧緹使亦心服加慰護至都下獄拷掠備至致贓十萬獄中遺家人書曰吾仕宦二十餘年只有山田數十畝可供祭祀所購吳中卷籍頗多可檢賣爲餬口費也遂與

高攀龍周順昌周宗建李應昇黃尊素繆昌期同斃於獄所謂後七君子者是也崇禎改元贈兵部侍郎謚忠愍特祠於郡學之西春秋致祭又允御史袁鯨請與前楊左六君子同建祠京師而吳之閭門及清涼山江之右粵之西浙之西湖亦各有祠

論曰當明季時以直節著者大抵皆風宇過峻批逆彈奸盡瘁捐軀自尋一死固其所也綿貞之死可哀哉劾璫糾朱爲民請命義正詞平乃與楊左高魏十三君子後先死于獄有明三百年元氣至是盡矣綿貞之學不欺爲本以釋圭君實自命歷官所至皆有政聲撫吳時江南大水上六疏賑災免漕吳人至今思之嗚呼又何其經濟名臣也

### 涂仲吉

涂仲吉字德公鎮海涂一榛季子生而骯髒喜談節義時論未之許也稍長入太學聞時事闕失輒頓足流涕一日在金陵聞黃道周詔獄時方飲投觴而起曰仲吉當一行爲朝廷保正士其友人謂之曰君拯溺義舉不度布衣之力將自致於九死之罪願君更思之仲吉歎曰黃公天下之正人也主上又英明天子也黃公見殺則天下之正人去主上殺黃公則朝

廷負殺直臣名事無大於此者因舉酒曰今日爲君  
盡觴明日入京師諫不聽卽藁葬長安門外耳遂問  
關赴闕上書通政使施邦曜難之曰生有取義之勇  
不度主上之怒將自致於不測之淵甚爲生危之仲  
吉作色曰朝廷奈何使選蠕者作納言乎邦曜愕然  
謝曰生年少見義敢爲老夫耄矣老夫不能當爲君  
一獲罪疏上仲吉盛陳道周學行敦摯言雖過戇意  
實忠純因引漢武唐宗待汲黯魏徵故事謂主上方  
欲遠法堯舜奈何知出漢唐庸主下且謂三季之主  
墜小人之術使賢人君子受黨人之禍以此摧士氣

海澄縣志

卷十二

人物

四

失人心今不宜復以黨人輕殺學行才品之臣上覽  
疏大怒杖仲吉於長安門外復下錦衣獄鞫指使者  
錦衣喬可用盛陳刑具仲吉曰吾閩南男子見義而  
動死卽死耳寧足怖耶可用撝其指盡折仲吉不少  
挫旣而懷宗亦稍悟乃與道周俱論戍未幾復赦還  
福王在南都給事中陳子龍薦可用不報閩中擁立  
唐王方震孺復薦仲吉自代授御史唐王亡仲吉不  
食十餘日嘔血死蓋世傳其節義不虛云

論曰吾漳負氣節自宋以來黃預忤蔡京劉衍折  
安石高登斥秦檜余嘉論侂冑然皆居其位抗志

陳忠觸乎羅網若仲吉起諸生批頷履尾奮不顧身直與黃劉高余諸君子後先接踵錦衣之獄拶指盡折乎而百折不回視前史有光矣

何楷 黃曰謹 江灝 涂一榛

何楷字元子號黃如鎮海衛人生有異質讀書寓目不忘舉天啓五年進士執政朱延禧欲援入詞館不應時魏忠賢肆毒縉紳楷不謁選而歸建紫芝書院率子弟講學其中衛故有海埠苦豪右徵稅言於監司永革之崇禎初起授戶部主事擢員外郎著廉能聲七年詔簡部曹爲言官大臣多推楷改刑科給事

海澄縣志

卷十二 人物

五

中轉工科再轉兵科晉工科都給事中流賊陷鳳陽燬皇陵楷疏劾撫臣楊一鵬按臣吳振纓罪末刺及輔臣溫體仁王應熊俄遂劾兩人朋比行私言振纓爲體仁私人一鵬則應熊座主有詔逮一鵬振纓下北司獄鐫楷一級又疏禁止內操及慎刑八議防海以勦滅爲主帝然之楊嗣昌奪情爲中樞楷與黃道周林蘭友劉同升趙士春等五人先後糾叅時稱奪情五諫再鐫二級調南國子監丞一時大江南北競以文章贊楷手爲評隲戶屢常滿有通侯某榜監生攫其厚貲諸司莫敢問楷爲伸理勾攝用事者不應

卽以白簡從事侯大恐還所攫金謝過遷南禮部郎中丁內艱歸復講學於紫芝書院鎮海舊有學宮歲久傾頹捐貲更新之服闋推淮揚巡撫再推漕運總督未下值戶部尚書員缺勳閣部科復交章推薦有旨召見未出閩而京師陷楷聞報與家人訣義在赴難會南都錄用舊人起戶部右侍郎轉左侍郎管錢法馬阮柄國時事日非屢疏乞休不報南都陷間關至閩題詩旅舍有曰風雨頻來有意無似因奔竄故嗔余除奸未請尚方劍守職空同轅下駒浪說蒙塵宜扈蹕誰云踰嶺可遷都自知進退成狼狽悔不當

海澄縣志

卷十二

人物

六

時觸玉除未幾閩中擁立唐王起官戶部尚書至則臚陳賦額清汰虛冒裁強鎮之請廣蠲逋之典議與鄭芝龍左會舉誓告大禮芝龍不至至停朝鼓楷憤懣具疏自糾曰御勅先頒臣民瞻仰而五等大臣曾不就列使見者詫異聞者驚疑凡在言職皆不當以無言所以尊朝廷而明分誼也唐王褒其風節命掌都察院事芝龍恨楷刺骨思所以中之不遺餘力遂決意乞歸行次栢臺遇盜截其一耳蓋芝龍使之也入里門廬墓側支離床席綖念軍國日就枯槁竟以是賫志以沒楷材質敏練凡章奏書札悉自起草未

嘗雕琢求工而娓娓數千言剴暢明切又留心世務當軍需匱乏年額缺至二百三十餘萬疏陳鈔法以紓司農之急如均收放分地界准搭配諸議皆鑿鑿可行居常好學不倦於經學尤留意所著孝經易詁詩世本春秋繹皆援據精博不苟爲傳會其春秋繹大抵以黃楚望趙子常二家屬詞比事爲主惜於昭定哀尚未卒業生平氣度冲融有大臣風而蹭蹬於衰朝崎嶇於未造史遷有云人能宏道無如命何有味乎言之也

黃曰謹字元祇鎮海衛人萬歷丁丑進士授工部主

海澄縣志

卷十二 人物

七

事分司清江浦以羨餘賑饑施藥遷郎中治孟城河條上兩疏時稱確議擢廣東副使理鹽法振刷弊竇商民頌德轉參政分守南贛調停稅使地方安堵陞按察使入覲值足疾當事者捃拾之改粵西叅政復入覲手輯金鑑錄數卷將獻經蘄水卒曰謹內行淳備事孀嫂撫孤姪有恩衛庠初建賦已額定士廩於庠第虛名耳曰謹力陳諸郡守請以衛官員缺俸充廩復置海頭港稅以資學宮之費出橐金遍給庠士闔衛德焉

江灝字質卿萬歷甲辰進士器姿英偉館選之日上

默識之特命大閱團營居諫垣嚴辭却佞稅監高竄肆虐於閩特疏糾之以方正不容出爲溫州叅議尋補高州其在官也好士愛民尤篤鄉誼值米價騰貴漳舶運載不得便公設法通之鄉民勒石厦島誌其德母老乞歸養天啓間璫焰方熾當路屢薦弗起家居二十餘年建祖祠置祀田子于任登賢書  
涂一榛鎮海衛人萬歷甲辰進士由金壇令擢吏部考察司凡貪墨吏一筆勾罷同官謂之曰毋乃太刻乎對曰一家哭何如一路哭正謂此也歷官以清正著

海澄縣志

卷十二 人物

八

論曰郡志編黃如經濟元祇才能夫經濟非才能何由展布才能非經濟將於何設施耶蓋學有本源才足相副坐言起行自同條而共貫若江與涂前志雖未論列而嚴詞却佞糾察貪汙端亮已見一斑才能經濟又安有不裕哉

謝宗澤 陳儀 許一敬

謝宗澤字麗卿萬歷丙辰進士由戶曹出守長沙公平廉威政聲烜赫尋陞江西叅政性本聰明過勞案牘遂請假歸構佛刹於犀天山率子弟讀書其中時以琴詩自娛歿後衿士思之立碣於芝山道一堂東

紀居鄉之盛德以示不忘

陳儀字思忒萬歷丁未進士由刑部郎出知肇慶府歷官至湖廣叅政秉性不阿以愛民養士興利除弊爲先務方在肇慶時革除陋規士民林敦正等立碑頌德分巡湖北常奉召入京時魏璫秉政有爲導意欲一見終不肯就是年卽引疾歸生平家居孝友謙讓淹通經史所著有承恩堂文集藏於家

許一敬字思禮萬歷癸未進士弱冠知名於經筵多所暢發得第後授江西建昌府推官內擢戶部主事又出榷澣墅關在官公廉不阿惠政有聞建昌人塑

海澄縣志

卷十二

人物

九

像祀之後以國恤憂心路經山東卒於齊河縣朝論惜之

論曰仕路梯榮自熱於進身者視之寧有止足之日哉麗卿一揮出守超擢方隆勇退遂決以視思忒炎熱不趨而山林引興何後先若一轍也思禮雖厄以年未知宦情視陳謝何如然在官民愛去官民思皆明乎進退之節矣

高克正 李世奇

高克正字朝憲八歲能屬文年十二督學胡定拔置第一自是屢試輒第一萬歷壬辰魁南宮選庶吉士

每館試又輒第一授翰林院檢討纂修國史同館疏請册立其所起草也天性篤孝忽二親相繼訃至擗踴號絕上疏乞終六年喪詔許加二年在籍以展孝思癸卯典浙江試入彀皆名雋而伎者造蜚語中之少宰楊時喬心知克正無他委曲申救僅擬補外會丁大母艱南返執經問業者屢滿矣間與二三名流稱詩郡芝山之麓舉觴掀髯蕭然物外也居恒語惟桑梓利病如禾平庄賦九都水利及機易山採金事輒娓娓爲當道主持之里人咸蒙其惠焉性好急人篋中貲輒散與宗族及布衣交略盡里中兒侮至門

海澄縣志

卷十二 人物

十

者笑謝之了不爲意嘗自書其齋云惟桑梓之地何意氣可以加人苟名節所關卽錙銖猶若浼已蓋名言也爲文初尚清婉晚乃氣益厚而神完卒年四十六所著有玉堂初稿木天署稿若干卷行於世

李世奇字亮先九歲喪父而善事母人稱李孝子長而好義方爲孝廉時邑令劉斯埭謀修港口堡衆憚勞費獨以身任之曰堡而弗堅猶無堡也何以衛民未幾寇至民賴以安村落不無驚擾復挺身諭之卽解去劉令曰孝子一言賢於勝兵十萬矣崇禎辛未成進士選庶吉士試輒先其伍然每曰此雕蟲安用

哉慷慨論天下事草疏欲上之念母老筮得豫之六二取介于石之義自號豫石遂改疏終養以歸歸十年部催供職復蒙旨召用連具揭疏以辭有云前旣念七十九歲之母以歸今安能舍八十九歲之母以出奉旨特加左春坊左庶子且令本縣月給粢一石爲其母膳蓋異數也居鄉不受私獻曰王山海當與民共之築堤減糶民德之立碑頌焉教子曰莫厭貧貧然後能自立養十五年母歿營葬訖悲恫不食而卒初巡按御史陸清源嘗疏薦云舍宦專以事親因而敦睦鄉族居家亦能報國要在利澤生民迨其

海澄縣志

卷十二

人物

十一

後父老知當時事者談及尚泣下

論曰二太史皆廟堂器也親沒則加二年喪母在則躬十五年養其德則同減莊賦興水利與捍寇救荒其功亦同惜乎未竟其用一奪於年一阨於遇也敢問其所以異曰高於黼黻非不足者李之經濟則有餘矣

曾應榮

蔡國禎

甘惟燦

陳國典

林明順

曾應榮字若槐六都人萬歷辛丑進士由戶部主事出爲桂林府陞惠潮兵備道又陞貴州按察使爲人和厚質實所在無赫赫名去後常見思六八都土腴

苦鹹應槩父唯爲諸生時卽決策上當道修南陂之  
圯開陡門於上曾田均受漑而制猶未備及應槩登  
第歸力成父志增陡門而三之益通西北二溪水又  
慮有旁洩者時友人程應龍亦登第歸相與協力築  
內溪陂以禦鹹潮自是苦鹹者歲稔矣民立祠壽春  
宮前祀曾氏父子更立碑亭頌曰開三閘水利灌三  
千頃田惠洽三都增萬家產業活萬人軀命功垂萬  
世方爲惠州兵備時有政蹟祀名宦本邑祀鄉賢  
蔡國禎字虛谷六都人萬歷癸丑進士爲人忠厚慈  
愛所歷皆戎務而寬嚴得體方爲兵部郎嘗監武闈

海澄縣志

卷十二

人物

十二

閱射特嚴弊竇曰非特欲得真才乃欲教始進者以  
正也及備兵兩浙則寬以待卒伍曰此班定遠所謂  
非孝子順孫者不 所以作其氣也以請養歸父母  
皆九十餘終喪年踰七十矣遂不出居家友愛特至  
諸弟有犯讓之而已磁陵上下港爭水利一言定之  
民立碑歸德焉殆爲善於鄉而施於有政者歟  
林明順字孝臣五都人雙眸炯耀性剛介崇禎庚辰  
成進士授廣東翁源縣調繁增城署東莞摘伏如神  
陋規革除殆盡三邑民建遺愛祠凡七筦故多盜肩  
輿入賊壘開諭禍福賊爲感泣留三日民誤以爲賊

將危之也輸金贖之一日間投櫃以萬計而賊已擁  
令輿至矣散金還民不受用以脩學宮整橋梁墜廢  
一新行取除御史奉勅典試粵西道經故治父老歡  
迎擁路同事太常陳天定嘆曰今乃知公德入人深  
也洎鼎革隱郡北桃林杜門教子不入城市御史霍  
達特薦稱疾不應卒年六十七門人禮部主事柯願  
士羅耿辰爲詩弔

之有云疎枝老葉千尋栢鉄骨水心一樹梅  
又云便是霜天常履葛縱非齋日少茹葷

甘惟燦字君及六都人崇禎元年進士選漢中府南  
定知縣有善政擢貴州道監察御史巡按直隸長蘆  
鹽課河道皆以清慎著聲轉廣東糧儲道副使尋內

### 海澄縣志

#### 卷十二 人物傳

#### 十三

陞太僕寺少卿轉左僉都御史遂致仕歸鄭芝龍奉  
唐王於閩杜門不出卒年六十有八

陳國璵字非石六都人登崇禎癸未進士未殿試歸  
隱漳上蒼園足跡不踐城闈戊子歲荒傾家資賑時  
兩臺以地方人才舉屢以親老辭澄文廟爲海寇所  
燬先捐百金倡建勵氣節自持服御多用古著有易  
啓微及史宗直指表其門曰清風高節

論曰若槐虛谷以郎署而旬宣孝臣君及由撫字  
而超擢皆當世器更流聞者甘棠之愛與枌榆之  
澤出處能並傳也非石懷才未試視當世器豈有

或殊時既不同所就自異是以君子論其世也

吳霞 陳鳶 紀孚兆

吳霞字汝華邑諸生篤志好古卽所居之旁特築小室扁曰顏巷聚書其中諸大儒語錄行錄輒手抄讀每語弟子曰世無眞儒學之一字弗明也學之主在立志其要在主敬所著有射禮輯說道原錄抄義集抄學則捨棄稿示兒篇年八十餘卒鶴峯蔡烈題其墓曰古學君子松泉吳先生墓

陳鳶字碩飛幼有大志讀書不願仕與兄英及中表林浩相友聞莆陽王侃齋以道德文章淑人相與負

海澄縣志

卷十二

人物傳

十四

笈從之既歸以禮自閑築室家廟之旁非弔喪問疾不出倦時散步郊原悠然自遠藝圃必正樹果木必直而方入對夫婦如嚴賓延納士流溫和可掬時以正言格論誘人聽聞平生與遊者連耳順林克諧往來論古不置克諧夫婦染疫暴卒鳶奔往爲經紀其喪人服其誼嘉靖丁巳寇掠月港所不焚者獨鳶居耳郡丞許鑰聞鳶名餽餉不受海憲周賢宣至澄訪之使家人辭曰某隸居編民有公事召無相見禮不敢見疾革無一語及家事惟召子弟示以喪禮危坐而逝

紀孚兆字道範僻處海陬卓然自奮極力營辦以事父母授徒遠村朔望必歸省有餽餉懷歸奉之父母色不豫率妻蔣跪問必得其懽居喪不入臥內廬墓三年衣冠古朴與人拜酬必命子弟執刺不屬僮僕教生徒以正學爲本兼及當世之務並時名輩如蔡烈林一陽皆傾心下之所著有心極圖說等編妻蔣事姑愛謹歲荒樵山捕水爲奉及歿解衣具殮躬自營墓朝夕悲號聞者曰眞孚兆妻也

論曰謝觀察彬云吳霞三人皆幽貞之士所謂深林芝蘭無人自芳歟以予觀之卽宋令艾郭長恭

海澄縣志

卷十二 人物

十五

不是過也

陳約 謝君禮 李任祿 陳炳淳

陳約字守甫大參儀之父也幼好學長遊於庠質直無謾語友愛尤篤季弟綏以寃成獄伯兄紹代之羈約走闕下訟寃庭鞫始得釋二十四將作亂率族人依險樹柵衆賴以安旣而議設縣治衙署逼隘約捐祖居充之又倡廣泮池以宏其規陳氏有甲第開先之符遂爲澄望族焉每教其子曰無欲害人充之可保四海其子果能施於官不負所教崇禎八年邑人請從祀鄉賢咸謂不媿祀典云

謝君禮字如立大參宗澤之父也早歲能文試嘗冠其伍既坎軻乃拮据課子嘗題句以示訓云少年甲子幾多時挨一日便拋一日爲己工夫宜着實瞞自家祇誤自家其子竟大其門皆趨庭之效也君禮友于尤篤宗黨克諧傍舍兒侵所居地默不與較有盜其園木者見而避之

李任祿名鐘以字行幼讀書長而服賈知大義祭物必躬置餽自親故者不敢以薦好面折人過鄉里有失唯恐入其耳子姪效時趨服必痛責又嘗有言曰凡久與處無闕失其入必僞不可近也子世奇自幼

海澄縣志

卷十二

人物

十六

與說古賢哲行誼里有公事以身先之縣令毛鳳鳴旌以義耆且曰必有興者迨其子科甲不及見矣然每及期先見夢於家人正直靈爽固不泯云

陳炳孝字愧淵六都人折節讀書值歲饑歎曰無以報二人顧反累之乎遂拮据家務且讀且遊居常課其子曰若當成吾志代我報所生迨長子國璵成進士鄉推祭酒乃恂恂戒族黨退讓而持身質素喜爲人解紛環吳養山設埭障鹹引淡以漑田疇鄉食其利郡邑兩首賓席嘗言與人當有惠心居己當有恒德人以爲名言順治十四年督學陳瑾檄祀鄉賢

論曰二陳皆才足自表而居以德謝和厚如范伯圭李端嚴王彥方之亞也謂必因子貴用是不朽非也貽親令名固賢者事若彼修身砥行則創垂之善自可以啓後人

陳孔叶 周世綱

陳孔叶知書仗義爲衆所推正統十一年饒賊千餘流劫市肆所至焚掠甚慘孔叶度其必至月港遂散家財倡募義勇扞木城樹樓棚爲戰備四月十九日賊果侵九都孔叶率衆與戰自辰至巳殲其渠魁鼓銳徑前復連斬十六人賊遁去奪還所擄男婦數百

海澄縣志

卷十二 人物傳

十七

人郡守鍾湘犒以金帛孔叶不自私頒諸衆鄉人立碑紀之趙渾撰文

周世綱輕財慕義所施德里人甚衆正統間鄧茂七攻郡城世綱身處海濱運私米千四百餘石助官府防守寇滅有詔旌其門里人爲立碑子朝恩有父風宏治中屢以家丁擒海寇有功鄉里

論曰世之降也有官守者猶偷全而敗乃事況無職事孰肯奮身且捐其私以濟公者孔叶智勇捍衛一方世綱慷慨轉輸助戰雖下邑之民乎實一世之士矣

蔡篆 李俊 蔡志發 郭煌 蔡紹旦  
戴璋 翁伯全 姚科

蔡篆治家嚴整嘗立家訓十條爲族屬矜式內外長幼五十餘口同居共爨一錢尺帛不入私囊至於娣姒亦遞相和睦庭無閒言子五人廸達迺選俱恪守家法至孫曾四世矣義讓之風流於遠邇推官黃直表其居曰義門直指聶豹督學高賁亨俱下教有司具儀崇獎

李俊性至孝年十六母潘氏寢疾醫莫能療聞其祖良嘗刲割愈母疾乃默禱割股作羹以獻母疾頓愈

海澄縣志

卷十二

人物傳

十八

推官黃直命旌其廬曰奇孝學憲邵銳高賁亨遞優禮之四明豐學士熙謫居鎮海道經其門歎其祖孫繼踵贈以扁曰世孝俊老疾篤子敦華衣不解帶亦以孝聞

蔡志發生平孝義辛勤經商所得盡歸其父不入私囊兄弟五人並相友愛同爨四十餘年嘗捐貲累石砌容川碼渡頭往來便之萬歷十八年歲飢米湧適志發所駕廣船二艘載米二千餘石平糶存活甚衆郡守李載陽扁旌其廬志發故妻程氏守節男甫寵克遵前訓任弋陽尉

郭煌字右波執信仗義族里稱之事父母色養備至弟郭煜到老共榻囊中財無私也前督學馮挺旌其門曰孝友別駕吳允焯署邑篆舉充賓筵榮以冠帶相國張贈扁曰彝倫儀表康熙二十年年八十餘矣邑令王衡才贈以聯曰三達最高唯齒德兩間特表在彝倫

蔡紹旦母疾嘗藥衣不解帶者經年兄弟早絕悉出己子爲嗣撫其所生女嫁之奉嫂楊氏三十載無間言郡守汪康謠旌之

戴璋衛軍也行傭供父母得錢卽市甘旨以進冬寒以身溫被抱父而寢以壽終

海澄縣志

卷十二

人物

十九

翁伯全衛軍也幼孤貧事母游至孝旣娶常令妻從母寢而自獨處一錢不私母歿哀毀三年

姚科鎮海衛人以孝子旌

論曰孝弟本也先師論士乃居其次未得施於國與天下遇則然耳故士能以一行修於家而著於鄉亦自不沒此歐陽子一行傳之所由作也觀於篆俊若而人天植之良各樹本根有志於門內者可以知所尚矣

周玉質 陳孔志 林以靖 洪應斗 張明

附許界

陳一韓

周玉質身長八尺勇力絕人嘉靖十二年山寇毒亂漳泉間官兵討捕不能制郡縣舉玉質率鄉兵禦之斬首數百級賊大潰玉質奮勇窮追被傷死事聞有司資給營葬鄉爲建祠別駕陳岳爲詩立石紀之陳孔志漳州衛鎮撫孔成之兄也天性孝友膂力絕人嘉靖己酉夏紅夷船直抵安邊館劫掠海道柯公喬別駕翁公燦急徵孔成孔成曰非吾兄不可孔志毅然受命獨乘巨艦率先衝賊斬獲甚衆賊懼灼砲中孔志背而死然賊自是遠遯地方以寧喬命別駕

海澄縣志

卷十二

人物

二十

王諫立石紀其事并遣官致祭焉

林以靖嘉靖己未武進士授漳州衛鎮撫次年饒賊犯漳以靖從叅將楊縉禦於長泰之渡頭衝鋒拒賊失援死之公私爲之痛惜

洪應斗初補郡諸生習騎射通兵法天啓壬戌武進士授福建水標把總丁卯海寇縱橫應斗帥所部舟師南援時副總兵陳希範駐師銅山應斗屬焉賊舸將至希範日恣酣飲有傳警者輒答之應斗告以當備不聽賊果乘風直下縱火焚舟我舟掛帆不及衆逃遯或赴水應斗率所部獨迎敵賊艘環之應斗手

刃數十人度終不得出乃抱巨銃自沈死希範既跳身以免反誣應斗敗逃給事顏繼祖具疏請卹以慰忠魂

張明良家子崇禎二年桔槔蜂起鄉里推爲兵目李之奇賊衆自普賢登岸明裂眚徑前手殲二賊援者不繼力戰而亡母劉氏早歲孀居守二孤以成立至是撫屍不哭自壯其有子也邑令余應桂請旌其閭是役也壯士許界亦拒賊死之

封疆奮揮戈獨斷膚一杯壯士血三尺羽林孤賊在鬼猶厲功成骨願枯國殤應不泯剪紙代編蒲

陳一韓大叅儀之子也和易無貴介氣由成均爲

### 海澄縣志

#### 卷十二 人物

廿一

山西理問署遼州篆不半月流寇至州素無備一韓出家財募士以守數日賊衆增至我師無援城遂陷一韓提家兵力戰而死事既平求其屍不得忽有女婦出告曰我知州官死處從而求之果得屍而女婦不復見衆皆異之

論曰周玉質等或死官或死事或從徒步捐身衛桑梓可謂國殤可祀俠骨猶香矣

明人物補傳

王應麟字仁卿白沙里人少從遊潘鳴時負笈至潘潘家人夢青龍入室鳴時曰是乘龍者徵耶乃以弟女妻焉萬歷丙子登賢書庚辰成進士授溧陽令溧劇邑也應麟至酌王文成鄉約法行之俗以丕變值有清田之役躬履阡陌稽其盈縮國賦惟均又增置社倉備荒民咸便之戴屋五載爲蜚語所中量移南雄郡丞署郡篆有奸民潛結妖僧將爲亂尅期舉事應麟廉得其狀逆黨悉就擒事聞詔賜金聲譽復起壬辰擢潤州守歷遷四川叅政再擢右方伯三殿需

海澄縣志

卷十二

補傳

廿二

材奉勅董事念蜀中歲歲採木兵革之後民困未蘇何堪巨役乃募荆商採取而官給以直躬臨涪渝釐剔姦弊終事而民無譁辛亥擢江西方伯道經江陵值巨漲皇木漂流楚人刮去蜀中題識冒爲楚材運官莫知所出應麟停舟江澣多方搆獲以輸上方癸丑拜京尹勲戚巨璫不敢干以私己復巡撫南畿百姓聞之踴躍相慶秩滿乞歸疏十三上然後得請時天下多故應□□里每關心國事神宗光宗憂詔繼至力疾哭臨病發不可支卒年七十有六贈都察院右都御史予祭葬

蘇敬字日躋八都人素勇於義南溪水利自宋郡守  
傅伯成砌石爲堰溉田千有餘頃利賴無疆景泰五  
年郡守謝騫令日躋脩築旣成復圯成化十七年郡  
守姜諒復令日躋子運判殷等踵而成之民感其惠  
呼曰姜公陂蘇氏父子實有力焉殷子霄宏治己卯  
舉人廣州府同知霄孫頌嘉靖五年武舉

海澄縣志卷之十二

終

海澄縣志

卷十二

廿三